

Zum zwedde Mool er liewe Leit
iss de Haarauverein heit bereit
fa zünftisch unsa Kerb se halle
met Musigg, Frohsinn, Stobbeknalle
meme Strauss, met Buwe, unn met Määde,
die ganz bestimmt sunschd fehle däde.
Drom will ich heit er liewe Gäscht
am Anfang fun dem grosse Feschd
dem kleen Verein e Loblied singe
der doch wass uff die Been dod bringe
der Frohsinn bringt, befreid funn Sorje
gischda, heit, bestimmd aa morje,
dem kleen Verein dem saama heid
fa viele Stunne Gemiedlichkeit
mach weida soo viel Johre noch
emm Haarauverein e dreifach Hoch Hoch Hoch!

Die Musik spielt:

Hoch soll er leben!

Vumm Unnerdorf do hamma enna
dass is e alda Schwerenöter
im scheene Wonnemonat Mai
es war so morjens nuure drei
do unne issa romgesprung
unn had e Liebeslied gesung
Ooooooooooooooh Siegrid sang er voller Lust
ich liebe dich aus voller Brust
genauso hadda sich vehall
wie e Goggelhahn im Hinkelsstall
es Landa, 's Rita uns Julia
sinn Wach wor vunn dem Singsangprulia
es Rita zu dem Sänger saat
du spinschd doch wohl imm heegschde Graad
er ruft enuuff: dass hann ich net wolle
dass er dass allegaa here solle
kanschd du mer eenmol noch vezeihn
ich bins doch noor es Wernerlein
es Siegrid in de Zwischezeit
e Eemer Wasser hat bereit
unn schitt es dann vunn owwerunna
uff dass liebesglierisch Haupt ennunna
gelöschd war gleich die Liebesglut
Wasser iss fa vieles guud
soo dreed der Casanova dann
ganz pudelnass de Heemweg an
Die Mussigg spielt dem arme Tropp:
„Was dood dass Wasser uff meim Kopp?“

Die Musik spielt:

Wasser iss zum waschen da falarie unn fallara

Sei Name will ich eich net nenne
unn trotzdem doon er ne gleich erkenne
er hat e ziemlich grosser Zinke
am liebschde dooda Freibier drinke
jetzt komme na bestimmt gleich druff
bei Neimanns wohnda owwe nuff
der iss dann das Jahr unbeschwert
uff die Plandascher Kerb mascheert
viel Freinde hadda dort getroff
e Eemer Wein unn Bier gesoff
unn so am frieje Nommidaa
do hats ne funn seim Stuhl geschlaa
unn anstatt schnurstraks heem se gehn
do bleibda noch beim Landa stehn
er gehd enin do kansch ne heere
wie er dod stunnelang noch dischbedeere
soo saufda aa noch stunnelang
bissa nimmie laafe kann
dann saada: „Ich will jetzt gehn'!
Erich komm unn fehr mich heem!“
Unn wie se uff die Trepp komm sinn
sitzt er sich noch e bissje hin.
E Schrei - de Erich frooht: „Wass iss?“
„Ei - mer hadd enna in die Hoos geschiss!
jetzt hann ich mich gesitzt, gebiggd,
unn alles richdich breed gedriggd!“
Schunn oftmols hat mas ihm gesaad
ma sauft net mee wie ma fedraad
emm Gips spielt die Musigg laut unn fein
„Ich bin ein altes Scheisserlein!“

Die Musik spielt:

Wir sind alle kleine Sünderlein es war immer soo

eener hamma in unserer Reih
der iss geere unn aa oft debei
beim Landa dots dem guud gefa'le
kenna wees wann der Schul dod halle
am Gymnasium issa Studienrat
wo er se unerrichde hat.

Enna se spendeere - dass leidem nett
doch Dorschd, denne bringda imma mett.
So aa baseerd amme scheene Daa
wie er mein Raad beim Landa war
doo hadda enna gedrunk unn zwee
unn drei unn vier unn imma mee
dass kühle Bier iss gud geloff
uff emoo wara voll gesoff
dann steida uff sei Bissyglett
unn nemmt ee Flasch mem Stern noch met
imm Zickzack issa abgefaa
doch dann hats Schiksal zugeschlaa
mede Karlsberschflasch hoch in de Hand
knalld er voll uff die Schlossbierwand
ganz schnell hat er uffm Asch gehuggd
ach Gott hat der Kerl dumm geguggd
es Rad kaputt - e Loch im Kopp
so han se ne dann uffgehob
doch dass hat denne ned gesteerd
Hauptsach: de Bierflasch war nix baseerd!
die Mussigg spielt dem derre Zinke:
„Am liebschde don ich Freibier trinke!“

Die Musik spielt:

Egon, ich hab' ka nur aus Liebe zu Dir.....

Zwee stick hann mer in unserer Reih
die sinn aa iwerall debei
fa eer Weibslaid sinn se kenn Gewinn
weil sie die allerschenschde sinn
der een iss Schitz uffem Gemeindeamt
der anna glabb vunn Humborg stammd
unn die zwee Männa treffe sich
doch imma wann e Feschdsche iss
a forisches Johr im Oktober rom
do sinnse widda sammekomm
am Kerwemondaamorje dann
uff de windschnorr hannse angefang
in Wasems, in Schwarze, beim Hugo drunne
ware sie die beschde Kunne
unn dann am nure siwwe rom
sinn die ins Kinokaffee komm
do hannse noch was Gess die zwee
dann saad der eend: „Es geht nimmee!
es Bier dass kommt ma owwe raus
ich brauch jetzt unbedingt e Paus!“
unn e Vollgesoffener, eer Leit,
kommt niemols in Verlegenheit
so hann se sich met letschder Kraft
e Logeplatz fass Kino beschafft
geschlooft hann die, kaum ware se drinn
vumm Film do hannse nix gesiehn.
Am annere Morje so om siwwe rom
iss de Alt am Wald funn de Nachtschicht komm
er sieht e Auto in seiner Wies
unn denkt bei sich wer dass wohl iss
er geht e nunna unn guggd ennin
was menne na - wer leid do drin?
kenn fun de greeschde, kenn vunn de glenschde,
nee nor fum Unnerdorf die Allerschenschde.

gischda Owed in Limbach ins Kino gang:
unn Heid morje im Auto uffde Wies gestann
dass iss jo e Wunner, ma solls net menne
wer hat dass schunn jemols erlewe kenne
die Mussigg spielt de Allerschende dann:
“Was brauche ma se spare - mer lewe nimmi lang!“

Aa zwee Alde wolle ma gedenke
unn ne e paar vunn unsere Zeile schenke
de Albrecht unns Landa die hann sich jetzt
zur wohlverdiente Ruh gesetzt
iwwer 4o Johr eer Leit
hann die das schwere Amt bekleid
fass Jedem gut unn Recht se mache
dass ware bestimmt ke leichte Sache
kenn Urlaub hann se sich gegönnt
sinn nor geloff, gesprung, gerennt,
es ganze Lewe hann se sich vesaut
hann uffgestockt unn angebaut
viel Vieh hann se gehatt, aa Wutze
unn jetzt han se nor noch viel se Putze.

DOCH DIE ZWEE JUNGE DO HINNE DRIN

die wo seit Januar Wertsleit sinn
trotzdems de Alte widerstrebt
don die ne weise wie ma lebt
mer schwädze gar net dromerom:
im Januar die Wertschaft iwwernomm,
Betriebsferien fa 14 Daa,
unn jede Dannerschda Ruhedaa,
unn was ma sunschd so alles sieht
jetzt hannse a noch e Mercedes gried
zum Schluss do werd dass immer mee
dann griense noch e Haus am Luganer See
die Musick spielt denne junge Flinke:
„Die Hauptsach mer hann Pinke Pinke!“

In Unnerdorf do wohnt e Kühner
hott bis vor korzem 15 Hühner,
die gaggerten und Eier legten,
bis dann der Da kam wo sie bebten.
Ihr Herr beschloß wie die Nochbarschaft
mei Hinkle wern jetzt abgeschafft.
es rendeert sich nimmie das Vieh se zichte,
Es is ned nur se fiedere, es is a se mischde.
Sei Entschluß war gefaßt, die Kebb mußte rolle,
er schnappt sich es Beil unn schwingts wie de Dolle.
Er geht ins Heisje unn zehlt nommo no,
Gott sei dank sinn die all grad do.
Er greift sich es erschde un leeds uff de Holzscheid,
Schwingts Beil, schlaad zu, geläbd die längschd Zeit.
So geht das Spiel weiter, es verzehd is dod,
Die Exekution nor noch emm ledschde droht.
Doch jenes war schlau, macht sich dinn unnerdesse,
de Schlächter kanns net finne unn suchts wie besesse.
Im Gaade, im Kornfeld, im Robert seim Stick,
doch es Hinkel is fort, er hat eenfach kenn Gligg.
Er is ganz ungligglich unn werd nimmie froh,
hat Rache geschwor unn singt dem Hinkel heit no.

Mussigg:

Warte, warte noch ein Weilchen,
dann kommt Äppel auch zu dir,
mit dem Hacke - Hackebeilchen
macht er Hackefleisch aus dir.

Do unne im Dorf, do wohnt e ganz schlimmer
wenn der gesoff hat, dann schleicht er immer
ganz sachte an sei Hausdeer ran
damit ne sei Fraasche net heere kann.
Deledschd mittags beim Landa er saß
unn sauft ganz gemiedlich Maß um Maß
do isser bei Feierowend strack besoff
unn zick - zackig zum Beatsche geloff.
Es Schlisselloch se finne warem awwa net mechlieh
drum dreht er paar Runde ganz gemächlich.
No enner Stunn ers Schlisselloch find
sei Fra kommt unn ruft: „Menschenskind!
Vor lauter Angst wär ich nägschd omkomm!
Seit rer Stunn laaft enner oms Haus erom!“
Der Schoges grinst heimlich unn denkt sich sei Däl
er wäs jo, daß ers war uff seim nächtliche Trail

Musik:

Denn im Wald da sind die Räuber...

Do hätt ma noch enner, den sollde ma lowe,
Uff eem Heefches Fest tat er sich ausdowe.
Eenmol war er schunn frie gekommen,
kippt Bierscher unn werd a ball leicht benommen.
Gudd Gesellschaft hodder im Oswald vunn do hinne,
denne wollder umgarne unn a umspinne.
Se zwedd dunse drinke, es werd immer doller,
der eene hald dorsch, de anner werd voller.
Sie lausche de Mussigg vumm Orchesterlein
unn sinn sich enisch, die Buwe spiele fein.
Wie die Musigg so spielt, fasst de Oswald e Plan,
er freit sich im voraus, heit grien ich ne dran.
Er macht emm de Vorschlach se dirischeere,
dofor muss der bleche un die Buwe kasseere.
Er hupst vorne rom, die Leid freie sich all
doch dann isser uff dem Podium omgefall.
Später sitzt er erheitert am Disch der Borusse,
fielt sich widder erstarkt, dud met ne enner nusse.
Zu später Stunn, willer noch met denne los,
doch grad noch richtig kommts Magda rigoros,
reißt die Audodeer uff, ruft doher mir gehn heem,
e Zeitlang Gerangel, dann kanns nimmi widderstehn.
Sitzt sich a noch enin, so sinnse gefahr,
enunner zum Frieda odder im Oswald sei Bar.

Musik:

Heit gee ma gee ma gar nimmie...

Uff'm Heefche drunne wohnt e scheeni Maid,
is gud proportioniert, hat aa frie schunn gefreid.
Die Mutti meinte: Es is jo so a scheen,
bei me Wettbewerb kennts als Miß Kohlhof gehn.
Unn aus dem Grund, das is jo ganz klar,
kame die Freier vunn de Blies, vunn de Saar,
unn hoffde uff des Mädels Hand,
dann hats e Limbacher am Gängelband.
Lang is e gud Eintracht, die Liebe is rosa,
doch dann komme Einwänd, die ware noch nie da.
Der Jüngling, der gude, is Arbeida nur,
unn das geht de Mutti Gä die Hutschnur.
Obwohl er verdiente beim Klein Lui gud Geld,
bei Mutti doch mee e Angestellter zehlt!
So dauerts nimmie lang - kommt was komme muß,
die Verlobung is erom, mit de Freindschaft is Schluß.
Der Jüngling is traurig unn gestern er geht,
wo gestern ein Consul, ein Mercedes heut steht.

Musik:

Wenn ich einmal reich bin...

Es kennt ne e jeder in unserm kleene Ort,
Vor e paar Johr isser in Humborsch bei Stumme fort.
Sei Wäg hatt ne dann no Erbach gefeehrt,
bei de Michelin dort, hadd sichs fa denne rendeert.
Er kried e neier Job, is entrunn dem alte doch,
awwa's wär net mei Sach, er werd Gummikoch.
E Zeitlang gehts gud, es klappt wie geschmiert,
doch e korzi Zeit später is doch was passiert.
De Gaul is mem dorchgang, die inneren Triebe
sie feerene zum Stammdisch, zum Bier, seiner Liebe.
Dort sitzt er bis spät in die Naachd nin eer Leid,
lossds laafe gluck gluck, mir wisses jo heid.
Am negschde Da, ma kanns jo vestehn,
wills mem Räfekoche eenfach net gehn.
Die Konsequenz leid uff de Hand,
vum Owe weg, versetzt zum Versand.
Die Tour war gedräht, awwa's war noch net aus,
doch die negschd Zech versetzt em endgildisch es Aus,
Was nooher passeert is, dass heert ma zwar selten,
er feiert 10 Daa Urlaub, ohne ebbes zu melden.
Die Quiddung is klar, er kried länger frei,
er muß uff die Suche no Arwed erneit.
Die find er in Humborsch, es werd widder näher,
heid steht er beim Bosch als Scheiwedräher.
Drum singe ma dem Alt aus voller Brust:
„Das Wandern ist unser beiden Lust!“

So singe ma jetzt zum gude Schluss
als erschder feierlicher Gruss
e hoch fa unser scheener Strauss
gischda noch im Wald do drauss
met bunde Bänner jetzt geschmiggd
so dass er alt unn jung entziggd
do hengschde jetzt als Kerbsymbol
dass wer dich sieht aa wisse soll
dass Kerb iss heit am Haaraustrand
unn do bassert so allerhand
so daaf ich dich met Wein unn Bier
unn zum Schluss do ruufe mir
mer sinn luschdich heit unn rufe noch
die Hefches Kerb sie lewe hoch
hoch hoch.....